

Scomenzadives e projec de defendura e sostegn de la mendranzes

L'é temp enscin ai 30 de november per portèr dant la domanes de finanziament a la Region

Cultura - L'é temp enscin ai 30 de november per portèr dant la domanes de finanziament per scomenzadives o projec de sconanza e promoziun de la mendranzes linguistiches de la Region (ladina, mochena e cimbra) da fèr te l'an 2010. Lo à fat a saer enstadì la Region Trentin Sudtiroi che à metù fora ence i criteries per poder apede ai finanziament. Pel portèr dant domana de contribut i comuns, autres ence publiches e sociazions che à sia senta ti teritories storiches de insediament de la mendranzes linguistiches regionèles, enc, istituc e organismes rapresentatives de la mendranzes o che laora per l ben de la mendranzes.

Podarà vegnir tout en conscidrazion chela ativitèdes che arà chisc argomenc:

lengaz: insegnament del lengaz de mendranza e realizazion de strumenc linguistics e de materièl per l studie e la cognoscenza del lengaz (gramatiches, dizionères, libres e c.i.);

cultura: l studie, l'ativitèdes de enrescida storica e dut chel che pel didèr la ricostruzion storica de la memoria de la mendranzes; elaborazion de idea neves e inovatives tel ciamp de l'atività culturèla, valorisan la cognoscenza

de la desvalianza anter i popui; studie, conservazion e recuperament del paesaje; organizazion de evenc sozio-culturèi; recuperament de guanc tradizionèi;

comunicazion: doura e comunicazion del lengaz scrit ence tras televizion, radio e internet, ti setores publiches e privac;

auta formazion: auta formazion te l'universitèdes de la Region col meter su neva catedres e baratò con outra universitèdes che fèsc valiva ativitèdes;

manifestazions e evenc: l'organizazion de manifestazions che deide a valorisèr l'identità e l sens de partegnuda de/a la mendranza linguistica;

relazions e raporc interregionèi e europeans: encontres, baratò culturèi envié via da enc publics, istituzions scolastiches e sociazions.

La proponetes de pech cont, co na speisa mendra che 1.500 Euro e la ativitèdes sportives no vegnarà toutes en conscidrazion.

Pel vegnir portà dant domanes per projec de investiment (en cont capital) a favor de enc o organismes de la mendranzes linguistiches regionèles (per la realizazion, la compra e la restruturazion de cèses e strutures).

La Jonta regionèla à fat fora la prioritèdes programatiches de l'atività de valorisazion de la mendranzes linguistiches per l'an 2010 e te la valutazion de la desvaliva domanes de finanziament la tegnarà cont di criteries fissé e de chisc obietives generèi:

1) sostegnir e valorisèr l lengaz de mendranza tolan ite duta la jent, i istituc e i enc per la formazion e l'insegnament del lengaz;

2) sostegnir la cognoscenches che revèrda la mendranzes linguistiches ence con programes de informazion travers i desvalives sistemes de comunicazion de massa;

3) sostegnir l'auta formazion e la enrescida per la crescimonìa e l svilup de la comunitàdes de mendranza;

4) promuover la specifica identità culturèla travers l rinforzament de la consaputa, del sens de partegnuda de na mendranza;

5) sostegnir te la sentes de organismes interregionèi e europeans la defendura de la mendranzes linguistiches.

L'ativitèdes de defendura e promoziun de la mendranzes tegnarà cont de la neva desposizioni de la lege nr 6 del 2008 "Normes de defendura e promzion de la mendranzes linguistiches locales."